

Sunday, April 5, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

REGIONAL NEWS BULLETIN

(MIDDAY)



EASTER

Tukin khan Kristian te ni pawimawh, Isua Krista, thihna hneha a thawhleha ni, Easter Sunday pualin Mizoram chhunga kohhran hrang hrangin hun an hmang a.

Zingkarah thalai leh Kohhran huaihawtin Sunrise Service Biak In chhungah leh Biak In kawt remchangah an hmang a, Kohhran tam zawkah chuan chawhma, chawhnu leh zanah Easter Sunday pualin hun hman chhonzawm a ni a, Kohhran thenkhatah chuan heng inkhawmah te hian thupui inang an nei a, chawhma inkhawm banah thingpui ruai an buatsaih bawk a, inkhawm pangngai bakah Kohhran thenkhat chuan lengkhawmin hun an hmang bawk. Kohhran hrang hrangah Kohhran thalai leh naupangte'n nizan atang khan Easter artui te cheiin vawiina inkhawm te tan an sem a ni.

Presbyterian kohhran chuan thupui thuhmun, chawhmaah 'Isua thawh leh thu zep bo an tum' tih te, chawhnu inkhawmah 'Sawmtute hnar ngai lo Lal Isua' tih leh zan inkhawmah 'Ringtute nghahfak - Thawhleha' tih te thupuih an nei a. Baptist Kohhran tam zawkah chuan chawhma leh zanah Easter Sunday pualin hun an hmang a, chawhma banah puitling leh naupangin a hrangin Sunday School an nei tel bawk a ni. Salvation Army chuan zingkarah Isua Krista thawhleha puangin Corp hrang hrangah band ten rimawi an tum a, chhun leh zanah Easter Sunday pualin inkhawm leh hun hrang hrang an buatsaih bawk.

SFX Salvation Army Band

United Penticostal Church - Mizoram leh North East India te chuan an remchan angin anmahni kohhran theuhah hun an buatsaih a. Thingpui ruai an buatsaih tlangpui a, kohhran thenkhat chuan tlaiah ruai an theh dawn bawk a ni.

Catholic kohhran te chuan Inrinni zan khan Easter Vigil hmangin Isua thawhleha Easter chu ropui takin an hmang a. "Krista chu eng a ni" tih lantir na'n Easter Vigil ah hian mei thar lak a ni a, Biak-in kawt atangin sathau khawnvar te chhi kaiin Biak-

in chhungah kawng zawh luh niin, inkhawm urhsun in a chhunzawm a, Thawhlehma puanchhuahna ‘Easter proclamation’ hun hman a ni a. He hunah hian tui malsawmna leh thu a rawngbawlina hman a ni a, baptisma a thutiam te lak thar lehna hun hman a ni baw. Easter inkhawm hi Catholic Kohhran ah chuan inkhawm zawnga urhsun ber niin, vawiin Easter Pathianni ah pawh Mass buatsaih leh a ni a, tualchhung kohhran tam tak, a bikin thingtlang lamah chuan Easter ruai an theh a. Zan lamah sathau khawnvar chhi engin Isua thawhlehma kawngzawh (Easter procession) huaihawtin Mawmbati kawngzawh hun an hmang baw ang. Catholic kohhran te hian khawvel pumah inkhawmna hi in ang vek in an hmang a ni.



MPCC

MPCC President Pu Lal Thanzara chuan Kristiante tan BJP an hnawksak zia sawiin Kristian nuai chimih duh leh tum mektu BJP thlawptu ZPM leh MNF te chuan ram an enkawl chhung chuan chunglam malsawmna, Mizoram hian a dawng ngai lovang, a ti.

He thu hi AMC Ward 18-na leh 19-na a Congress hruaitute buatsaih, infuih tharna hun a hmanpuina-ah sawiin, MPCC President Pu Lal Thanzara chuan Mizo mipuite ringtu inti a, kristian za-a-za, thenawm State te pawhin chutiang mi nia min hriat laiin hmanni lawkah Orisa State-ah Pastor pakhat chu BJP talhfiak ten a hnung khirhin tuihawk in tirin Bawnggek an barh lui a. BJP talhfiak RSS leh Bajrang Dal ten duhdah taka an sawisak laiin, thenawm lawk Meghalaya CM ten nasa taka Kristiante thlavang an hauh laia Mizoram CM ber a ngawi reng mai chu a vanduaithlak tak zet a ni, a ti.

Pu Lal Thanzara chuan, Kristiante’n nasa taka tihduhdahna an hmachhawn laia Mizoram CM a ngawi reng mai hi chu Kristian nuai chimih tumtu BJP mitmei a venna a nih thu sawiin, Aizawl mipui, Mizo mipuite leh kohhran mite harh a hun tak zet ati a. Kristian Missionary ten Chanchinṭha hriina kawngah harsatna tam tak an taw a. Kristiante tan a pawh khawp ang, a ti baw.



GAS

Thudawn bawhzuiin Central YMA Vigilance Sub Committee hruaitute chuan Khamrang-ah Zopuii Gas ta tur Truck phurh chu a khalhtu te leh Khamrang mi 2 inthuralin an lo tihchingpen laiin an man.

CYMA hruaitute hnen atanga thu dawn danin Gas hi bur 6 siam chhuah tumin an bei a, a ruak bur 1 thun khah na’n a tak awm bur 15 vel an tichingpen thin niin an sawi. Bur 2 an lo thun khat hman a ni. A tichingpen tute hi zilh-hau an ni a, hnu-ah tih tawh loh an intiam hnuah, chhuah leh an ni a, Gas tihchingpen nana an hman bur 6 leh a hmanrua man sak an ni baw.

